

欽
定
全
唐
文

欽定全唐文卷三十四目錄

元宗 十五

加魏知古實封勅

受太上皇誥勅

平戎告廟勅

賑岐華等州勅

授徐有功子惲恭陵令勅

命張知運持節赴軍勅

遣使安撫江東勅

授蘇又右補闕勅

授薛訥隴右道防禦大使勅

召募兵勇勅

行常平法勅

罷親征吐蕃勅

幸新豐蠲復勅

優給二王後及隋後勅

誅左感意勅

令蕃客國子監觀禮教勅

許盧懷慎去官養疾勅

禁驪山樵採勅

放姜皎歸田勅

進蔬食並斷都城屠宰勅

賜蒲州童子勅

禁惡錢勅

度河南參軍鄭詵號州朱陽縣丞郭仙舟爲道士

勅

賜京畿縣令勅

金史卷一百一十五
三
令考試投匭人勅

禁屠勅

復崔日用實封勅

流僧人懷照勅

定母服齊衰三年勅

賜關內河東河西入朝蕃酋等勅

遣祠南郊華岳溫湯勅

銓擇内外官勅

賜朝集使勅

令內外臣僚各舉縣令勅

策試貢舉人含元殿勅

賜貢舉人朝堂坐食勅

討康待賓等勅

禁重徵租庸勅

流蔣寵藤州勅

停給職田勅

誅裴景仙勅

宴朔方軍節度及將士勅

巡幸東都賜賚從官勅

減東都禁囚等罪勅

幸并州推恩勅

祠霍山勅

命王駿檢閱朔方諸軍勅

諸州府馬數闕額以監牧馬充勅

貶王同慶贛縣尉勅

欽定全唐文卷三十四

元宗 十五

加魏知古實封勅

魏知古去年七月已前屢申啟沃每竭忠誠奸臣有謀先奏其兆事君之忠良可嘉歎可更賜實封一百戶

受太上皇誥勅

王公文武百官等邇者事出不虞凶邪構逆賴天地叶德宗社降靈應時誅翦朝野寧謐慶慰之至與卿等同懷太上皇志尚無爲捐茲俗務軍國庶政委成朕躬祇奉聖謨

膺斯負重顧惟菲薄何以克堪若臨大川罔知攸濟冀王
公卿士百辟庶寮勳力同心輔相休命各盡誠節共洽維
新

平戎告廟勅

邊境爲患莫甚於林胡朝廷是虞幾煩於將帥車徒屢出
芻粟載勞使燕趙黎氓略無寧歲而山戎種落常爲匪人
近有野心窮而歸我曾是懷附每所綏柔而不變梟聲輒
爲獸搏幽州節度副大使張守珪等乘閒電發表裏奮討
積年逋誅一朝翦滅則東北之稭便以廓清河朔之人差

寬征戍皆上憑九廟之略下仗羣帥之功今其凱旋敢不以獻宜擇吉日告九廟所司準式

賑岐華等州勅

如聞三輔近地豳隴之間頃緣水旱素不儲蓄嗷嗷百姓已有饑者方春陽和物皆遂性豈可爲之君上而令有窮愁靜言思之遂忘寢食宜令兵部員外郎李懷讓主爵員外郎慕容珣分道即馳驛往岐華同豳隴等州指宣朕意灼然乏絕者速以當處義倉量事賑給如不足兼以正倉及永豐倉米充仍令節減務救懸絕者還日奏聞

授徐有功子倫恭陵令勅

徐倫父有功昔爲理官時密刑網遂能堅守忠直每抗回
邪海內稱其不冤朝廷賴其惟恤永言種德必歸餘慶宜
甄嗣子俾勸羣臣

命張知運持節赴軍勅

大漠南守長河北介地險可憑天兵有警夏潦方壯冬冰
未合料敵安邊存乎備預靈武道行軍副大總管右領軍
衛大將軍張知運神氣雄傑兵謀果斷持軍出塞可使單
于喪膽抗敵臨邊足令勇夫增氣宜令先持節赴軍簡行

處置并緣邊州軍兵馬等亦委知運量事均融仍與幽州刺史攝御史中丞強修計議便宜支備事訖聽整入京奏事姚崇職兼樞劇未要即行副旣掌同一依軍令

遣使安撫江東勅

淮海惟揚是稱谿險山川重複水陸殷湊去歲田收稍乖豐稔今茲人庶頗致饑乏朕爲之父母深用惕然近聞兩澤應節秔稻有望目前之困餬口猶切思從蠲省用救荒弊宜令給事中楊虛受往江東道安撫存問觀察疾苦詳理冤滯百姓間有偉才異行藏鱗戢羽隱淪屠博栖遲閭

間官人內有貪冒苟得背公徇私或潔己自修養望充位者還日各以名聞所至之州具令宣布求瘼恤隱稱朕意焉

授蘇乂右補闕勅

蘇乂父往處台衡實爲柱石直言正色挫彼凶邪頃者念功錫以真賦兄頰又遵先誠固辭令賞泣血披誠不忍移奪自家刑國父忠子孝宜有褒崇寵及兄弟諫官之任允屬象賢可右補闕

授薛訥隴右道防禦大使勅

棄瑕錄用有國通典捨罪責功先王舊式薛訥蘊韜鈴之
略總文武之任委以分閫冀靜邊塵遽聞喪律實負朝寄
準其所犯合寘嚴刑言念老臣寬其小戾即捨孟明之罪
佇收馮異之功可隴右道防禦軍大使

召募兵勇勅

戎狄憑陵每勞征戍比興師旅猶未掃除緣邊之人頗有
其患朕爲父母實用憂勤今欲親按邊疆躬行弔伐宜令
朝廷召募勇夫壯士拔萃逸羣者稱爲屯衛飛騎且各量
與賜帛行迴之日簡入羽林自餘之人取爲長行仍令兵

部侍郎韋抗紫微舍人王珽即於朝堂簡募十日內具所得人姓名奏聞

行常平法勅

天下諸州今年稍熟穀價全賤或慮傷農常平之法行之自古宜令諸州加時價三兩錢糴不得抑斂仍交相付領勿許懸欠蠶麥時熟穀米必貴即令減價出糴豆穀等堪貯者熟亦準此以時出入務在利人其常平所須錢物宜令所司支料奏聞

罷親征吐蕃勅

犬戎背恩豕苻爲孽犯塞侵牧乘洮涉渭朕託王公之上
居司牧之尊憫彼蒼生情勤整旅戒嚴有日先命偏師前
驅進討扼喉拊背拉朽摧枯今諸將追奔相望獻捷遁逃
已來邊鄙方寧夫出師天上觀兵塞下所以用威武也念
人勞弊與人休息所以暢恩惠也彼戎狄之爲患必在誅
夷苟黎元之獲安寧資順動況去有徒費追無所及兼懷
供帳之勞宜輟共行之典前取今月十二日親征者宜停
幸新豐蠲復勅

惟此新豐湯泉是出古之順豫義兼巡省頃者觀風數臨

茲地以察冤滯詢於故老閭里歡康田疇墾闢況冬降積雪春期有年且諺王遊果符時邁雖千乘萬騎咸給於主司而累月再來頗勤於除掃宜下復蠲之令慰其望幸之心新豐縣百姓免其一年雜差科縣官及溫泉監官經兩度祇承者與一中上考

優給二王後及隋後勅

二王後每年四時饗廟牲及祭服祭器並官給其帷帳凡案有關亦官給主客司四時省問子孫準同正三品蔭隋後每年給絹三百匹米粟二百石並春秋支給仍準見承

襲人親兄無分襲者與三分餘各一分兄弟有得職事官者其物即還見襲人

誅左感意勅

好生之德雖叶於天意止殺之義用勸於先靈仁者因而不犯殺者豈以爲暴前廓州刺史左感意頃居塞上拔自行閒薄效未輸率情狂鄙輕侮彝憲侵擾公司職數旣多割剥滋甚曾饑狼之不若固害馬之宜除比令按問咸自承伏且緣邊人徭役辛苦朕嘗思惠養特所哀憐寧有作牧宣條恣行非法儻不悛於常典何以塞彼深愆宜其處

置以謝百姓

令蕃客國子監觀禮教勅

夫國學者立教之本故觀文之道可以成化庠序爰作皆
分澤於神靈車書是同乃範圍於天下近戎狄納款日歸
夕朝慕我華風孰先儒禮由是執於干羽常不討而來賓
事於俎豆庶幾知而往學彼蓬麻之自直在桑葚之懷音
則仁豈遠哉習相近也自今以後蕃客入朝並引向國子
監令觀禮教

許盧懷慎去官養疾勅

留侯多病漢皇許其頤養呂蒙未瘳吳王因而憐戚此則
古之義也銀青光祿大夫檢校黃門監兼上柱國漁陽郡
開國伯盧懷慎大才宏識資忠履信學窮墳典文緯邦國
朕之倚賴人實具瞻頃者忘身徇公積勞爲癘竭誠抗表
固辭在職方欲省其謀慮專於導引且憑針艾之術副朕
鹽梅之期宜聽去官許其養病

禁驪山樵採勅

驪山特秀峯巒俯臨郊甸上分艮位每洩雲而作雨下出
蒙泉亦蕩邪而蠲瘵乃靈仙之攸宅惟邦國之所瞻可以

列於羣望紀在咸秩自今以後宜禁樵採量爲封域稱朕意焉

放姜皎歸田勅

西漢諸將多以權貴不全南陽故人並以優閑自保觀夫先後之迹吉凶之數較然可知良有以也太常卿上柱國楚國公監修國史姜皎衣纓奕代忠讜立誠精識比於橋元密私方於朱祐朕昔在藩邸早申款洽當謂我以不遺亦起予以自愛及膺大位屢錫崇班茅土列爵山河傳誓備蒙光寵特冠等夷朕每欲其戒盈用克終吉未若避榮

公府守靖私第自宏高尚之風不涉囂塵之境沐我恩貸庇爾子孫宜放歸田園以恣娛樂散官勲封並如故

進蔬食并斷都城屠宰勅

今在過密又逼忌辰起今日後至來年正月上旬以來並進蔬食所司準式此限內仍令都城禁屠殺

賜蒲州童子勅

蒲州童子吳豸之薄綴小篇兼記古事不稍優異無申獎勸宜賜其父絹十匹令更習學便有成就

禁惡錢勅

古者聚萬方之貨設九府之法以通天下以便生人若輕重得中則利可和義若真僞相雜則官失其守頃者用錢不倫此後深恐貧窶日困姦豪歲滋所以申明舊章懸設諸樣欲其人安俗阜禁止令行

度河南參軍鄭詵號州朱陽縣丞郭仙舟爲道士
勅

觀其文理是崇道法至於時用不切事情宜各從所好並罷官度爲道士

賜京畿縣令勅

親百姓之官莫先於邑宰成一年之事特要於春時卿等
列在三畿各知人務宜用心處置以副朕懷農功不可奪
蠶事須勿擾市獄在簡典正宜肅徭賦須平豪強勿恣凡
著賢能必無曠職即宜好去

令考試投匭人勅

諸投匭獻書上策人其中或有懷才抱器者不能自達宜
令理匭使料簡隨事探蹟仍加考試如有可採具狀奏聞

禁屠勅

五月是齋舊有常式六月緣忌特令斷屠宜令所司進蔬

食府縣捉搦勿令屠宰

復崔日用實封勅

唐元之際逆黨構兇崔日用當時潛論其事及於戡翦實預元謀而所食之封後以例減功旣居多特宜準初食之封與二百戶

流僧人懷照勅

懷照訛言信無憑據量其情狀終合微懲宜遣播州安置到彼勿許東西馮待徵等事已經恩赦特從釋放

定母服齊衰三年勅

惟周公制禮當歷代不刊況子夏爲傳乃孔門所受格條之內有父在爲母齊衰三年此有爲而爲非尊厭之義與其改作不如師古諸服紀宜一依喪服文

賜關內河東河西入朝蕃酋等勅

嘉爾蕃酋慕我朝化相率歸附載變炎涼而忠懇不渝明誠勤勵深宜輯乃戎落捍彼方隅使烽火無驚障塞咸謐必厚賞崇班當取富貴朕比加恩貸爾實安堵恐衣服未盡充災患且未恤永言於此良用憮然其今春不入朝都督衙官并箭頭將軍在蕃者已令王峻張說楊敬述等取

軍中庫物各賜爾等衣一副部落有疾苦量給藥物無令
田隴廢業舍養失所遞相勉諭以悉朕懷

遣祠南郊華岳溫湯勅

頃歲未登水旱不節今春事方起農桑是憂祈於上元福
茲下土式展郊禋之禮以申誠請之心宜令左常侍元行
沖攝侍中祠南郊太常長官分祭華岳溫湯

銓擇内外官勅

刺史古之通侯公卿國之重臣百揆時敘必在得賢萬邦
咸寧期於共理郎官出宰仰於前事方伯登台聞之往躅

頃來朝士出牧例非情願緣沙汰之色或受此官縱使超
資尚多懷恥亦朝廷勲舊暫鎮外臺却任京都無辭降屈
且希得入衆以爲榮爲官擇人豈合如此自今已後諸司
清望官闕先於牧守內精擇都督刺史等要人兼向京官
中簡授其臺郎已下除改亦於上佐縣令中通取俾中外
迭用賢良靡遺庶績其凝九功惟允即令銓擇以副朕懷

賜朝集使勅

卿等兼承朝委分職外臺陳國之法制爲人之師長將何
宏宣政要阜安毗俗熙我淳德以臻太和頃年以來戶口

逃逸波逝而往井邑虛弊州縣不以爲事逋亡乃是其常
言念下人豈無懷土之戀思皇多士未有移風之術緝寧
政教仁遠乎哉提振公方道存於爾宜加招撫咸使安服
又去年諸州申有旱澇流亡雖聞蠲放莫能平允多非清
正守法或以暗慢順情在於公私俱不折衷自今已後務
從於實卿等職在親人稍存意於此宜躬問疾苦務從簡
惠勸以桑穡敦其學校利而勿害靜則自安卿等每還之
時朕亦嘗有具誠及聞至彼多不遵行咸以爲朝廷常務
會同常禮因循旣久罔以爲意卿宜敷宏朕意宣慰人心

勉思政途以奉朝獎如仍舊相習當別有處置事有不便於人者各與按察使商量奏聞

令內外臣僚各舉縣令勅

戶口安存在於撫育移風易俗莫先令長知人不易此選良難專委吏曹或未精審宜令在京五品以上清官及諸州刺史及四府上佐各舉縣令一人並限勅到十日內京官封狀進外官附狀奏所舉人得官以來一任之中能有善政及不稱所舉其舉主應須褒貶

策試貢舉人含元殿勅

卿等知蘊韜略學綜古今喬木將遷虛鍾待扣既膺旁求之辟佇聞明試之言各整爾能對敷所問古有三道朕今減其二策近無甲科朕將存其上第務收賢雋用寧軍國並宜即存緩詳思之

賜貢舉人朝堂坐食勅

興化立理急於雋賢呈才效用屬在文武朕恭默思道寤寐勞求長想幽仄屢申徵賁今邊隅未靜師旅時興屬聽鼓鼙載懷屠釣廣求百夫之特以作四方之守總夫戎政爰詔武臣宏我風教諒惟儒林卿等或謀慮深遠或學藝

該通來應旌招深副虛佇並宜朝堂坐食訖且歸私第即
當有試期也

討康待賓等勅

朕臨御寰極思養黎元一物不安則推溝軫慮萬方未乂
則分閫興憂近者蘭池叛胡無端構孽蠢爾兇醜敢忘恩
化再令招諭仍未歸正理絕矜容事資撲滅旣從斯而背
德不獲已而用兵朕今發隴右諸軍馬騎掩其南徼河東
九姓馬騎襲其北三城士卒截其後六郡驍雄擊其前四
面齊驅萬全直進飛走無路糜爛待斃其蕃漢軍將以下

合 卷之五 三 九 三 四
戰士以上若生擒及斬獲康待賓等一人白身授五品先是五品以上授三品如臨陣先鋒能破北胡部落所獲資財口馬牛羊並便入立功人等一切不須官收仍別加官賞其叛人內有能自殺獲送者應酬官賞亂常之罪一切並原正是忠臣憤激之時壯士立功之日恭行天罰允叶人謀摧枯拉朽匪朝伊夕布告軍州咸知朕意

禁重徵租庸勅

如聞天下諸州送租庸行綱發州之日依數收領至京都不合有欠或自爲停滯因此耗損兼擅將貨易交折遂多

妄稱舉債陪填至州重徵百姓或假託貴要肆行逼迫江淮之間此事尤甚所由旣下文牒州縣遞相稟承戶口艱辛莫不由此自今以後所有損欠應須陪填一事已上並勒行綱及元受領所由人知其受納司不須爲行下文牒州縣亦不得徵打仍委按察使採訪如有此色所由官停却具狀奏

流蔣寵藤州勅

朕以菲德恭承大寶執天下之政奉宗廟之靈於今十載矣何嘗不日愼一日雖休勿休夙夜憂勞無忘鑒寐永惟

萬事之統恐累三光之明幸天地休和羣生樂業尚且內
惟輔弼外咨牧宰徵諫納善舉才任賢佇求瘼以利人思
進道以益化宇宙至大軍國事殷慮一物之失所當萬方
之重責故設黜鼓以通諫許士庶之進言而政教未孚澆
訛日甚獻言者苟求自達論事者多涉於妄國子進士常
州人蔣寵學不師古識未知今或離間君臣或非毀骨肉
固是異端阿僻之說甚乖輸忠效直之意若寢以成風則
姦險道長人而無禮法所宜誅朕志在好生情求進善恐
求者未悟儻默而不言思存大猷務設寬典宜決杖一頓

移貫藤州爲百姓自今已後貢舉及陳奏上封者必須景行循謹無使僥倖成名若制令有虧禮刑致紊失於政理責在朕躬則敬佇昌言法當無隱百辟兆庶識朕意焉

停給職田勅

所置職田本非古法爰自近制是以因循事有變通應須刪改其內外所給職田從今年九月以後並宜停給

誅裴景仙勅

有善必賞所以勸能有罪必誅所以懲惡代天理物勤憂萬姓求瘼恤人寄之牧宰共理天下實在於茲裴景仙幸

以緒餘素無名簡恣行貪冒不憚典刑聚斂之賦向五千
匹肆其威虐剝我黎元自作何逃仍更亡命此而將捨罪
孰可誅雖法有常科合置投竄而情在難恕用申懲肅宜
令集衆決殺仍宣告遐邇

宴朔方軍節度及將士勅

律總戎朔陞經略萬里賦軍籍馬精卒銳兵自其有虞莫
不素練而醜虜背誕偏師致誅謀若有神取如俯拾雖廟
略之云遠亦將士之力焉威武載揚頑凶且懾窮寇覆巢
以奔北羣師掉鞅而來歸因其凱旋聊加宴樂各宜坐飲

相與盡歡

巡幸東都賜賚從官勅

出震奮豫本乎觀風省方展義期於利物朕志惟忘已情
在順人爰採謠歌式事巡幸自轉蹕西鎬即宮東周景暖
風恬無凜冽之慘煙和氣舒佳晏溫之色俾夫軍衛衆庶
靡有郊寒之虞豈非龜筮允臧堪獻卜征之吉天人叶應
俟予之誠感是休和良以有慰思覃慶澤沃於行所親王
賜物八十匹嗣郡王六十匹一品五十匹三品四十匹四
品三十匹六品二十五匹七品二十匹八品九品十匹三

衛引駕細引飛騎各四段曠弩手募士主膳供飯及諸色
白身人等各三段知頓使知營幕使各六十匹知頓御史
三十匹知驛御史及知頓判官知營幕官賜各加一等入
仗突厥吐蕃共賜物五百匹令鴻臚據蕃望高下節級分
付供頓州百姓所據緣頓差科及充夫匠雜役供應等人
宜放今年地稅餘戶等免今年地稅之半應定名供頓縣
官各與一中上考

減東都禁囚等罪勅

獻歲肇春陽和感氣且是發生之日實惟布德之辰朕將

幸秦京言離雒邑既省方以觀俗思宏恩以濟人載念狴
牢又惻襟抱宜敷寬大之典用敦祝泣之意其都城內見
禁囚徒除身犯十惡及造僞頭首餘雜犯死流等各減一
等徒以下並放河南府遭水百姓前令量事賑濟如聞未
能存活春作方興恐乏糧用宜令王怡檢問不支濟者更
量賑給務使安存

幸并州推恩勅

朕躬承寶位十有餘年荷累聖之昌圖膺三靈之睠命日
慎一日雖休勿休今省俗觀風肆覲羣后陳詩納賈親問

百年雖念勞人事資展禮太原舊國王業所興乃眷成周
西巡豐鎬因惟嗣漢東至沛鄉皆會彼舊都眷茲粉社況
興王始封之地鴻圖創業之初含育生靈大造區宇永惟
丕構顧慙貽厥且稱用武戎役是殷宜錫懷舊之恩以順
發生之澤太原府境內見禁囚徒除十惡及造僞頭首餘
並放免預宴官共賜物二千匹父老及吏人等共賜物一
萬匹百姓宜給復一年九等戶給復三年元從家給復五
年其家籍見在終身免征役侍老年八十已上賜物五段
版授上縣令仍賜緋婦人版授上縣君九十已上賜物七

段版授上州長吏仍賜緋婦人版授郡君百歲已上賜物
十段版授上州刺史仍賜紫婦人版授郡夫人孝子順孫
義夫節婦旌表門閭終身勿事其有沈淪草澤抱德栖遲
及武德功臣子孫并元從子孫才堪文武並委府縣搜揚
具以名薦

祠霍山勅

河東冀方其鎮惟霍神爲天吏山有嶽靈在昔皇業初興
肇蒙嘉祉今者省方旋軫重獲休徵同受三神之貺獨忘
百邑之禮其霍山宜崇飭祠神廟秩視諸侯蠲山下十戶

以爲灑掃晉州刺史春秋致祠

命王峻檢閱朔方諸軍勅

王者之師有征無戰將以懷柔服叛非欲黷武窮兵犯令
凌政則杜之賊賢害人則伐之維其封疆辨其旗物此皆
夏官之政也咨爾兵部尚書同中書門下三品朔方軍節
度大使上柱國中山郡開國公王峻寅亮天地弼予一人
頻總元戎克清河朔師徒效力武威遠振遺氓懷仁以思
順殊類望聲而款服勲載王室朕甚嘉焉蓋六月出車周
美仲甫古訓是式俾修我戎宜以來月巡朔方兼往河西

隴右河東河北等諸軍簡較兵馬點閱器械各與所管節度處置務令得所備預之道其在茲乎

諸州府馬數闕額以監牧馬充勅

諸州府馬闕數稍多既合官填復須私備貧兵力致實以爲難宜令所司即勘會闕數與閑廐使計會取監牧馬充貶王同慶贛縣尉勅

朕問俗觀人務存節儉先有處分不許煩勞王同慶違法擾人借斂無紀望鄉科被率戶出鞋屏風花盤計盈數百徵求既廣般運又勞以此字人豈我良宰宜書刑典以誠

具寮

欽定全唐文卷三十五目錄

元宗 十六

示節儉勅

重牧宰資望勅

賜益州長史張敬忠勅

改丹水爲懷水勅

令御史行齋勅

慎選法官勅

令本州長官舉人勅

金史卷之三十三
以雨澤頻降昭報山川勅

禁斷奢侈勅

選皇太子諸王妃勅

令州郡勾當諸稅勅

禁和市反配違格勅

加錢糴常平倉米勅

以元元皇帝眞容應見宣付史館勅

戒勉京畿縣令勅

貶責羅希奭張博濟勅

準令王妻爲妃勅

編戶籍勅

禁隱蔽人戶等第勅

戒州縣擾民勅

頒示箋註道德經勅

破奚契丹告享陵廟勅

幸潞州勅

賜百官九日射勅

命錢物兼用勅

禁屠宰勅

給復京畿關輔勅

以突厥可汗卒輟朝勅

禁資課稅戶徵納見錢勅

遣祭郊廟山川勅

戒牧宰勅

賜刺史縣令帛勅

決殺張瑄等兄弟勅

與侍臣論服制勅

聽逃戶歸首勅

幸西京勅

令諸州年終申報戶口實數勅

疏決禁囚勅

度壽王妃爲女道士勅

千秋節賜父老宴飲勅

自東都還至陝州推恩勅

流宋廷暉周仁公裴裔勅

改太廟官名勅

錄開元以來名臣事迹付史館勅

勒停蒲絳等州兵士勅

遷擢宗正少卿崔秀等勅

皇太子諸王改名勅

改諸廟署隸宗正勅

定關輔庸調勅

賜朝集使勅

遣牛仙客往關內諸州安輯六州胡勅

停孝弟力田舉人考試詞策勅

停每年小團勅

始讀時令推恩勅

試文詞舉人賜食勅

備輅車儀仗勅

以破奚契丹告廟勅

欽定全唐文卷三十五

元宗 十六

示節儉勅

朕聞舞者所以節八音而行八風豈徒誇詡時代眩曜耳目而已也自立雲韶內府百有餘年都不出於九重今欲陳於萬姓冀與羣公同樂豈獨娛於一身且珠翠綺羅孰非珍玩嘗念百金之費每惜十家之產是以所服之服俱非綺羅所冠之冠亦非珠翠若弋綈之制大帛之衣德雖謝於古人儉不忘於曩哲庶羣公觀此當體朕之不奢

重牧宰資望勅

朕欲妙擇牧宰以崇風化亦欲重其資望以勵衣冠自今已後三省侍郎有闕先求曾任刺史者郎官闕先求曾任縣令者

賜益州長史張敬忠勅

勅益州長史張敬忠頃者西南阻化徭役殷繁山川旣接於夷戎縣道有勞於轉輸自剏鎮撫百姓咸安革弊遷訛良多慰沃歲陰寒極比平安好今賜卿衣一副至領之蜀州青城先有常道觀其觀所置元在青城山中聞有飛赴

寺僧奪以爲寺州旣在卿節度檢校勿令相侵觀還道家
寺依山外舊所使道佛兩所各有區分令使內品官毛懷
景道士王仙卿往蜀川等州故此遣書指不多及

改丹水爲懷水勅

不息惡木忍渴盜泉行道之人避惡名也朕常覽上黨記
稱秦坑趙卒血流丹谷名其水爲丹水者省方此路懷古
惻然邑號獲嘉地稱修武前王故事將有所憑宜改丹水
爲懷水改丹水府爲懷仁府其鄉里名號亦仰州長官隨
事改易

令御史行齋勅

封祀告成爲萬姓祈福必資清潔以副朕心其行事官及齋郎應致齋者宜令御史行齋切勿容踈怠

慎選法官勅

比來所擬法官多不慎擇或以資授或未適才宜令吏部每年先於選人內精加簡試灼然明閑法理者留擬其評事以上仍令大理長官相加簡擇並不得授非其人

令本州長官舉人勅

朕聞以道得人者謂之儒切問近思者謂之學故以陽禮

教讓則下不爭以陰禮教親則遠無怨豈非習無不利教
所繇生者乎朕以厚儒林闢書殿討論易象研覈道源冀
淳樸大行華胥非遠而承平日久趨競歲積謂儒士爲冗
列視之若遺謂吏職爲要津求如不及頃亦開獻書之路
觀揚己之人闕下之奏徒盈席上之珍蓋寡豈宏獎之義
或有未孚將敦本之人隱而未見天下官人百姓有精於
經史道德可尊工於著述文質兼美宜令本司本州長官
指陳藝業錄狀奏聞其吏部選人亦令所司銓擇各以名
薦朕當明試自觀其能若行業可甄待以不次如妄有褒

進必加明罰

以雨澤頻降昭報山川勅

爰自首春有憊時雨朕憂勤祀獻精禱靈祇遂蒙九元垂
福百神効祉膏澤頻降嘉生繁育睠彼山川能興雲雨報
功享德祀典存焉諸州府所管名山大川宜令當處長官
設祭務盡誠敬以昭典禮

禁斷奢侈勅

雕文刻鏤傷農事錦繡纂組害女紅粟帛之本或虧饑寒
之患斯及朕故編諸格令且列刑章冀以還淳庶皆知禁

如聞三公以下爰及百姓等罕聞節儉尚縱驕奢器玩猶擅珍華車服未捐珠翠此非法之不著皆由吏之不舉也宜令所司申明格令禁斷

選皇太子及諸王妃勅

所選皇太子及諸王等妃既是百官子女禮合避人今追就府縣及過本司未爲得所其應預妃者宜令所司具名錄奏各令女及近親隨使於命婦朝堂待進止

令州郡勾當諸稅勅

諸州稅及地稅等宜令州郡長吏專勾當依限徵納訖具

所納數及徵官名品申省如徵納違限及簡覆不實所由官並先與替仍準法科徵

禁和市反配違格勅

年支和市合出有處官旣酬錢無要率戶如聞州縣不配有家率戶散科費損尤甚設令給假亦慮隱藏宜令所司更申明格勅應欲反配須審料度所有和市各就出處

加錢糴常平倉米勅

自今歲普熟穀價至賤必恐傷農加錢收糴以實倉廩縱逢水旱不慮阻飢公私之間或亦爲便宜令所在以常平

本錢及當處物各於時價上量加三錢百姓有糶易者爲收糶事須兩和不得限數配糶訖具所用錢物及所糶物數申所司仍令上佐一人專勾當

以元元皇帝眞容應見宣付史館勅

道體無方元宗有應形標柱史名叶新興宗廟垂休生靈蒙福宜付史館宣示四方

戒勉京畿縣令勅

諸縣令等撫綏百姓莫先於宰字煦育黎人須自於厥德卿等日在京畿各親吏理務在用心以安疲瘵庶期成政

金定三月五
卷三十三
以副朕懷

貶責羅希奭張博濟勅

前始安郡太守充當管經略使羅希奭幸此資序叨居牧
守地列要荒人多竄殛尤加委任冀絕姦訛翻乃嘯結逋
逃羣聚不逞應是流貶公然安置或差攝郡縣割剝黎甿
或輟借館宇侵擾人吏不唯輕侮典憲實亦隳壞紀綱擢
髮數僣豈多其罪可貶海東郡海康尉員外置張博濟往
託回邪跡惟憑恃嘗自抵犯又坐親姻前後貶官歲月頗
久逗遛不赴情狀難容及命按舉仍更潛匿亡命逭刑莫

斯爲甚並當切害合峻常刑宜於所在各決重杖六十使夫爲政之士克守章程負罪之人期於悛革凡厥在位宜各悉心

準令王妻爲妃勅

準令王妻爲妃文武官及國公妻爲夫人母加太字一人有官及爵者聽從高敍但王者名器殊恩或頒異姓妻合從夫受秩甲令更無別條率循舊章須依往例自今已後郡嗣及異姓王母妻並宜準令爲妃

編戶籍勅

諸戶籍三年一造起正月上旬縣司責手實計帳赴州依式勘造鄉別爲卷總寫三通其縫皆注某州某縣某年某籍州名用州印縣名用縣印三月三十日納訖並裝潢一通送尚書省州縣各留一通所須紙筆裝潢並皆出當戶戶口内外一錢其戶每以造籍年預定爲九等便注籍脚有折生新附者於舊戶後以次編附

禁隱蔽人戶等第勅

天下戶等第未平升降須實比來富商大賈多與官吏往還遞相憑囑求居下等自今以後不得更然如有囑請者

所由牧宰錄名封進朕當處分京都委御史外州委本道
如有隱蔽不言隨事彈奏

戒州縣擾民勅

政在養人人安其業先王所以用明察之長求忠信之師
務斯道也朕勤恤庶政保綏羣元濟育之誠不違於終食
聽理之慮每軫於宵興將使載其清淨息其勞費如聞輦
轂之下政令猶煩或廣修器物將有供侍或差歛人戶以
充庖費豈副朕薄賦輕徭息人減費之意其雒陽令韋紹
縣尉顏思賓輒有科率擬備祇供雖事未行終是專擅宜

貶出河南尹孟溫禮雖不覺察狀異知情宜特寬捨自今
已後府縣宜洗心懲革不得更然其或不悛仍有勞擾仰
百姓即詣匭使具狀奏聞輒不得稽壅所犯之人當有處
分

頒示箋註道德經勅

昔在元聖強著元言權輿真宗啟迪來裔遺文誠在精義
頗乖撮其旨歸雖蜀嚴而猶病摘其章句自河公而或略
其餘浸微固不足數則我元元妙旨豈其將墜朕誠寡薄
常感斯文猥承有後之慶恐失無爲之理每因清晏輒扣

元關隨所意得遂爲箋註豈成一家之說但備遺闕之文
今茲絕筆是詢於衆公卿臣庶道釋二門有能起予類於
卜商鍼疾同於左氏渴於納善朕所虛懷苟副斯言必加
厚賞且如諛神自聖幸非此流懸市相矜亦云小道旣其
不諱咸可宣言勿爲來者所嗤以重朕之不德

破奚契丹告享陵廟勅

誅有罪討不庭去其毒螫登於仁壽固以俯安庶類仰叶
靈心頃以兩蕃背恩爰命龔伐精意虔告順天行誅于旄
所指不戰而潰山谷遺類盡爲俘馘疾如震霆動若神助

豈非昊穹垂福陵廟降靈故得萬旅安全一隅澄晏永惟
昭感之著先洽顧懷之福虔奉明靈載深寅畏宜令所司
擇日發使告享諸陵廟

幸潞州勅

朕往在藩邸遊歷潞城歲月頗多人情亦厚今因巡省再
過此邦初至歡呼皆有繇衷之感將去停立益知戀主之
誠言念此心孰不能變雖天下爲一政有何殊而王者無
私議不謂此特宜優異以納羣心其潞府百姓丁壯等免
征行令其分番宿衛定名長從仍委長史韋虛心審問父

老百姓等如此處置可否奏聞

賜百官九日射勅

大射展禮先王創儀雖沿革或殊而遵習無曠往有陳奏
遂從廢寢永鑒大典無忘舊章將射侯以觀德豈愛羊而
去禮緬維古訓罔不率由自我而闕何以示後其三元射
禮即宜依舊遵行以今年九月九日賜於安福樓下

命錢物兼用勅

貨幣兼通將以利用而布帛爲本錢刀是末賤本貴末爲
弊則深法教之間宜有變革自今已後所有莊宅口馬交

易並先用絹布綾羅絲綿等其餘市買至一千以上亦令
錢物兼用違者科罪

禁屠宰勅

道家三元誠有科誠朕嘗精意禱亦久矣而初未蒙福念
不在茲今月十四日十五日是下元齋日都內人應有屠
宰令河南尹李適之勾當總與贖取其百司諸廚日有肉
料亦責數奏來并百姓間是日並停宰殺漁獵等兼肉料
食自今已後兩都及天下諸州每年正月七月十月元日
起十三至十五兼宜禁斷

給復京畿關輔勅

百姓屢空朕孰與足言及於此良所疚懷如聞京畿及關
輔有損田百姓等屬頻年不稔久乏糧儲雖今歲薄收未
免辛苦宜從蠲省勿用虛弊至於州縣不急之務差科徭
役并積年欠負等一切並停其今年租八等以下特宜放
免

以突厥可汗卒輟朝勅

情義所在禮固隨之豈限華夷惟其人耳突厥毗伽可汗
頃者雖處絕域嘗以臣子事朕聞其永逝良用悼懷務廣

宿恩以制權禮宜令所司擇日舉哀

禁資課稅戶徵納見錢勅

天下百姓正丁課輕徭役所入惟納租庸人以安之國用
嘗足比緣戶口殷衆色役繁多每歲分番計勞入任因納
資課取便公私兼租脚稅戶權宜輕率約錢定數不得不
然如聞州縣官僚不能處置凡如此色邀納見錢或非時
徵納賤賣布帛旣輕蠶織爭務貨泉農桑之間頗亦爲弊
朕每思敦本將以便人期於省約使致通濟自今以後凡
是資課稅戶租脚營窰折里等應納官者並不須令出見

錢抑遣徵備任以當土所司均融支料嘗令折衷十道使
明加簡察勿使乖宜

遣祭郊廟山川勅

時和年豐神所福也精意備物祭之義也朕每爲蒼生嘗
祈稔歲微誠有感丕應乃彰今宗社降靈神祇効祉三時
不害百穀用成遂使京坻遍於天下和平之氣旣無遠而
不通禋祀之典亦有期而必報宜令兵部尚書兼中書令
晉國公李林甫工部尚書同中書門下三品邠國公牛仙
客即分祭郊廟社稷尚書左丞相裴耀卿祭中嶽禮部尚

書杜暹祭東嶽御史大夫李適之祭西嶽太子賓客王邱
祭北嶽國子祭酒張說祭南嶽其四瀆四海四鎮及諸名
山靈跡等各委所繇州長官祭仍令所司即擇日聞奏務
修蠲潔之禮以致精明之德冀申誠懇如朕意焉

戒牧宰勅

朕本求牧宰務在理人前所策試恐有遺逸載令中書門
下銓擇得卿等高科副朕旁求之意然郡縣者國之本牧
宰者政之先朕每屬意此官有殊餘職頃來刺史縣令多
不得人致令戶口未能安業斯亦朕之不德所以寤寐勞

想辭命旁求搜揚所知親加試擇卿等實爲舉首深副朕懷今故與卿相見卿等到任之日百姓間有不安穩事一條奏朕別加聽察佇卿政能若一任之內風化有聞當擢以不次有非常賞若不達意苟復因循亦當有非常罰朕此舉可謂求仁得仁何憂郡縣不理卿等且去即與卿處分

賜刺史縣令帛勅

卿等各能用心副朕所委今茲歲會風政有歸是用激揚以勵清操

金史卷之三十三
決殺張瑄等兄弟勅

張瑄等兄弟同殺推問款承律有正條俱合至死近聞士庶頗有誼譁矜其爲父復讎或言本罪冤濫但國家設法事在經久蓋以濟人期於止殺各申爲子之志誰非徇孝之夫展轉相讎相殺何限咎繇作士法在必行曾參殺人亦不可恕不能加以刑戮肆諸市朝宜付河南府告示決殺

與侍臣論服制勅

朕以爲親姨舅旣服小功則舅母於舅有三年之服是受

我而厚以服制情則舅母之服不得全降於舅也宜服總麻堂姨舅古今未制服朕思敦睦九族引而親之宜服袒免又鄭元注禮記云同爨總若比堂姨舅於同爨親則厚矣又喪服傳云外親之服皆總是亦不隔於堂姨舅也若以所服不得過本而須爲外曾祖父母及外伯叔祖父母制服亦何傷乎是皆親親敦本之意卿等更熟詳之

聽逃戶歸首勅

朕臨御天下二十四載何嘗不孜孜問政業業興憂以德一心與萬人請命故宗廟降福乾坤致和使匈奴成父

子之鄉犬戎爲姻好之國西南邛笮皆曰內臣東北林胡是稱邊扞何奉天之德能遠洽於戎夷而安人之政獨不行於諸夏使黎甿失業戶口凋零忍弃粉榆轉徙他土傭假取給浮窳求生言念於茲良深惻隱豈惟朕德所未及教有未宏歟亦由牧守專城莫能共理令長爲邑多或非才俾猾吏侵漁權豪并奪故貧窶日蹙逋逃歲增若不開恩何從遷善天下逃戶所在特聽歸首容至今年十二月三十日內首盡其本貫有產業者一切令還若先無者具戶數聞奏當別有處分其有限外不首潛匿亡歸靡懷亭

育之恩仍蓄逋亡之計即當分命專使在處搜求散配諸軍以充兵鎮懲其犯命替彼居人仍各委採訪使及刺史縣令明加曉諭使知朕意

幸西京勅

以前議西幸屬歲不登關輔之間且欲無擾今稼漸熟漕運復多而陵寢久違蒸嘗永感農隙順動得非其時前取今年十月幸西京者以其月三日發東都取南路應緣頓所要務從節減所司明爲條例勿有煩勞

令諸州年終申報戶口實數勅

朕以百姓爲心固非一人獨理委之牧宰輯寧兆庶若考
論政績在戶口存亡不有甄明何憑賞罰自今以後天下
諸州戶口或刺史縣令自離任者並宜分明交付州縣仍
每至年終各具存亡及增加實數同申並委採訪使重覆
報省所司明爲課最具條件奏聞隨事褒貶以旌善惡

疏決禁囚勅

朕每思政本先教後刑而難遷之徒抵罪猶衆幽繫囹圄
綿歷歲時今漸向鬱蒸豈忘惻隱仍慮持法者不謹得罪
者有冤若無省察何云哀矜天下見禁囚犯十惡死罪及

造僞頭首劫殺人先決六十長流嶺南遠惡處自外死罪
先決一頓並流嶺南流罪情狀重者決六十輕者決一頓
決訖並放徒已下並放其有隱沒詐情官物及盜仍責保
立限徵賦準節文處分其官人犯賊合解免仍勿令重上
都城內宜令中書門下京城委留守外州委本州長官即
疏決處分

度壽王妃爲女道士勅

聖人用心方悟真宰婦女勤道自昔罕聞壽王瑁妃楊氏
素以端懿作嬪藩國雖居榮貴每在精修屬太后忌辰永

懷追福以茲求度雅志難違用敦宏道之風特遂由衷之請宜度爲女道士

千秋節賜父老宴飲勅

今茲節日穀稼有成頃年以來不及今歲百姓旣足朕實多歡故於此時與父老同宴自朝及野福慶同之並宜坐食食訖樂飲兼賜少物宴訖領取

自東都還至陝州推恩勅

朕永懷西土陵寢在焉至自東都誠慰罔極兼茲巡省且無怨思僕予之望多謝哲王飲至之規豈忘前典其供頓

州應緣夫役差科並免今年地稅行從飛騎萬騎三衛引
駕監門各賜物五百段兵曠掌閑及諸色當番人各賜物
三段緣路供頓刺史縣令及專知官各賜一中上考從行
有職掌武官賜勲一轉京兆及岐同華三州畿輔之間百
役所出至於征鎮又倍餘州其今年租并依本州納其脚
縱已支入京亦令所司計折酬還兩京城內及京兆府諸
縣囚徒反逆緣坐及十惡故殺人造僞頭首死罪特宜免
罪長流嶺南遠惡處其餘雜犯死罪隸配効力五年流罪
並放罪人犯賊量罪貶降緣近頓所損麥苗宜令州縣即

簡括量酬價直畿內侍老九十已上量賜酒麪鰥寡憚獨
及征行之家宜令州縣長官親自存問如有疾患量加醫
藥使近甸之內咸有賴焉

流宋廷暉周仁公裴裔勅

朕思致時和每矜刑典而貪叨之吏抵犯自多猶冀恥格
豈在哀矜宣州溧陽令宋廷暉等各効官榮非無祿利不
能砥礪乃黷貨贓使者繩違刑曹定罪並當極法合正嚴
科然而發生在時布澤茲始永言惻隱能無惠恤乃期改
過且用輕刑宜並配流即差綱領送雖止殺之義頗乖於

國體而好生之德冀洽於人心教而不誅庶乎不及何必峻罰然後爲善凡今在位宜副此懷

改太廟官名勅

宗廟所奉尊敬之極因以名署情所未安宜令禮官詳擇所宜奏聞

錄開元以來名臣事迹付史館勅

朕君臨萬邦多歷年所於今行事動必見書循以舊章傳諸實錄豈朕之獨理所賴良臣或詢謀以濟其事或規諷以成其道開元以來勲庸德業者咸宜備敘其身已沒者

宜令子孫具錄事跡送史館

勤停蒲絳等州兵士勅

今邊隅無事寰宇乂安甸內置烽誠則非要其蒲絳等十二州置兵士等共一萬八千九十八人宜並停勅還本邑

遷擢宗正少卿崔秀等勅

古者官宿其業吏不數變實欲觀其始終因以別其能否若用捨非當遲速不備是開趨競之門豈曰和均之道宗正少卿崔秀等名行早著朝廷所推各效一官已經四載

器能有適久次當遷宜副僉諧俾膺茲命且承平日久從
任者多必憑考績方爲進轉但須慎守豈滯其能如或躁
求是招其累速則不達謙而必通凡今庶寮宜悉朕意

皇太子諸王改名勅

古之名子必由象類人道之大可無愼乎皇太子鴻及慶
王潭以下往所製名或亦未當今以德命悉宜更之太子
鴻爲瑛慶王潭爲琮忠王浚爲璵棟王洽爲炎鄂王渭爲
瑤榮王滉爲琬光王浚爲琚儀王維爲璲潁王湮爲璈永
王澤爲璘壽王清爲瑁延王涸爲玠盛王沐爲琦濟王溢

爲環信王沔爲理義王淮爲玘陳王渙爲珪豐王澄爲珙
恒王漣爲瑱涼王浹爲璿汴王滔爲璈及惠寧太子惠宣
太子之子皆改從王

改諸廟署隸宗正勅

宗正設官寔司屬籍而陵寢崇敬宗廟惟嚴割隸太常殊
乖本系奉先之旨深所未安自今已後諸廟署並隸宗正
寺

定關輔庸調勅

關輔庸調所稅非少旣寡蠶桑皆資菽粟常賤糶貴買損

費逾深又江淮苦變造之勞河路增轉輸之弊每計其運脚數倍加錢今歲屬和平庶物穰賤南畝有十千之穫京師同水火之饒均其餘以減遠費順其便使農無傷自今已後關內諸州庸調資課並宜準時價變粟取米送至京逐要支用其路遠處不可運送者宜所在收貯便充隨近軍糧其河南河北有不通水利宜折租造絹以代關中調課所司仍明爲條件稱朕意焉

賜朝集使勅

朕比擇長吏兼分命使臣所冀安人佇彼成績未知去歲

之後至今秋以來郡縣之間如何致理招攜復業何爲處
置頃聞諸道路遠近稍熟百姓貯積多少卿等親人之職
庶事合知宜以實言用慰虛佇

遣牛仙客往關內諸州安輯六州胡勅

古之降虜皆置邊郡將遂畜牧之性以示柔懷之德河曲
之北先有六州羣胡編列積百年餘往緣康待賓等輒搆
凶黨自取誅夷註誤蕃落損害良善因茲移隸令其失業
永言戀本寧不懷歸朕每念及昆蟲猶慮失所況於此輩
豈忘安輯如聞已有逃在關內諸州及先招攜在靈慶州

界者宜委侍中牛仙客於鹽夏等州界內選土地良沃之處都置一州量戶多少置縣其有先所隸州未來者一放歸各另據簿籍勘會勿容虛假處置訖聞奏

停孝弟力田舉人考試詞策勅

孝弟力田風化之本苟有其實未必求名比來將此同舉人考試詞策便與及第以爲常科是開僥倖之門殊乖敦勸之意自今已後不得更然其有孝弟聞於郡邑力田推於鄰里兩事兼著狀跡殊尤者委所由長官特以名薦朕當別有處分更不須隨考試例申送

停每年小團勅

天下諸州每歲一團貌旣以轉年爲定復有籍書可憑何至勞煩不從簡易於人非便事資釐革自今已後每年小團宜停待至三年定戶日一時團貌仍令所司條件處分始讀時令推恩勅

朕仰稽古訓思致人和爰發繇衷之旨以行順時之政今孟夏初吉三農在朝禮先決於薄刑義必寬於輕繫旣聽其令用軫於懷囹圄之間少聞於冒犯澄清之使咸盡於忠公猶慮吏有煩苛人或冤滯是爽和平之氣殊乖敬授

之心其天下見繫囚徒及事發應推身不禁者放即遣使分往諸道量事疏決及宣布時令除犯贓賄名教十惡死罪自餘徒已下特宜放免迴日奏聞務在欽恤以稱朕懷
試文詞舉人賜食勅

古者求士必擇其才考之以文施於有政自非體要何用甄明頃年以來亦嘗親試對策者衆而登科者少蓋繇宿構之詞不與所問相對所以然也卿等博達古今聿膺推薦朕之所問皆有節目宜指事而對勿措游辭並宜坐食食訖就試

備輅車儀仗勅

古者分命公卿巡謁陵寢率皆乘輅以備其儀雖禮則是常不可廢闕而事有適要亦在變通宜令太僕等司每陵各支輅兩乘并儀仗等送至陵所貯掌旣免勞煩無虧肅敬其公卿出城日如常儀至陵所準此

以破奚契丹告廟勅

蕞爾狂胡尚有餘孽近令討襲應時摧敗豈朕菲德能茂厥功此繇宗廟之靈所以然也宜擇日告廟